

HAEREPO

Haerepō e taahi nā te fenua  
Nā te òfafa i te aratiā  
E tae atu ai i te ùtuafare o te mau atua  
Ua api te reva i te haruru o to reo i te marupō  
I te òreroraa i te àere atua  
Te atua o te pō, te atua o taù nūnaa

Ua maruao te parauraa, ua hiti te rā  
Ua mure rā te reo o te Haerepō  
Ua mahuta hoì te nuu atua  
Aore o te nūnaa e vavao faahou  
Te taamino noa nei i te àvelà òre

Tei hea te mau rautī. Ua mate anaè  
Auè te nūnaa, èie ua maheàheà  
Ua iti tei pohe tapu i te marae  
A tū, a tū e te Haerepō, ia peepee  
Ia pinal ā to reo i nā peho o te fenua

E te Haerepō, e rautī i te fenua  
Ia i ā te reva i to reo i te marupō  
Ia ara, ia itoito, ia ora te nūnaa  
E pee te māmoè i te pohe o te māmoè  
Nā vai e ārai i te pohe o taù nūnaa

E haapii āaoa hoì au nei  
Aore a hoì au reo i matara  
E rautī rā vau e ia mure taù aho  
Mai te Haerepō aore e mata i hiò àtu  
I te òreroraa i te nuu atua  
Ia noho mai, ia ora te nūnaa.

Turo a Raapoto

E AHA TE TIARAA OROMETUA

E uiuiraa teie no te manaò, i muri aè i te mau hohoà i tāvirihiā mai i roto i te āfa ta teata e tei nenei-roa-atoā hia i roto i te veà.

Orometua aò, orometua haapii

E aò te metua i ta na tamarii ia hape o ia e no te faaite ia na i te mea tiā ia ravehia. Eere te aò i te tamaì, e faatitiāifaroraa rā. I roto i te aò, te vai atoā ra te haapii.

Mai te peu e aò te òrometua i te feiā faaroo ia hape, e haapii atoā o ia. Te auraa, e aratai o ia i teie feiā i te ìte.

E aha rā te faufaa i te hoè metua ia aò i ta na tamarii mai te peu aita o ia e horoà ra i te hohoà, mai te peu aita o ia iho e āfaro ra. Ia hinaaro te hoè metua i ta na tamarii ia ìte i te faaapu ia horoà o ia iho nā mua roa i te hiòraa. Ta na e rave ra, ta ta na atoā ia tamarii e rave.

Mai te reira atoā te òrometua. Nā na e aratai i te nūnaa i to na tiāmāraa, tiāmāraa e noaa nā roto i te ìte i te mau haapiiraa a te Metia

E tiāraa teimaha mau teie: e aò, e haapii e aratai. Hoè anaè rā ta na hiòraa, te Metia. Teie Metia ta na e tāvini nei, te Metia o te feiā veve e te paruparu, te Metia tei riro ei ora no to te ao.

Te ora e te pohe

E aha te ora, tei hea te ora. Ia matara te mea e haafifi ra ia ù, i to ù oraraa, ua ora ia vau. Ia matara te taura o te puua, ua ora ia te puua.

E aha te ora no tatou e te Māohi i teie mahana. E aha te mea e tāmū. noa nei ia tātou i teie mahana, a parau

ai tatou e aita e māpuhiraa aho. Ua riro te tītauraa i te ora ei àroraa tuutuu òre. Te àro ra te nūnaa Taratoni no to rātou tiāmāraa, no te mea ua vai noa na ratou i raro aè i te haavīraa e te tātua òre-hia to ratou parau. To rātou tiāmāraa, to ratou ia ora. Ia noaa rā teie tiāmāraa, e àroraa ā ia no te tahi ora maitai atu. Eita teie tītauraa i te ora e hope maoti i roto i te pohe.

Te pohe, te fatiraa ia te manaò, te feruriraa, te tiaturiraa, i raro aè i te tahi mea pūai atu. E pohe te manaò i te moni, e pohe te manaò i te faariāriā, e pohe hoì te tino i te maì.

Te ora, te ìmiraa ia i te pūai e vī ai te moni, te riāriā, te maì hoì. Te tiāraa o te òrometua, te horoàraa i te tiaturiraa i te taata e tei roto i te Metia te pūai e riro ai rātou ei taata tiāmā, ei feiā ora, eiaha rā ei feiā pohe e te tiaturiraa pūmahana.

Ei tāvini te òrometua no vai

E taata manaò paruparu e te feàa noa ta teie ui i fānau. Paruparu i te rauraa o te mau faatiani huru rau. Te vai nei te feia faaroo, ua faaroo ra ia vai. Ua faaroo anei i te Metia e ta na mau haapiiraa, aore ra ua faaroo noa i te àtete moni.

E atua ètaeta roa to te àti Iuta : "Eiaha roa to èe ei atua è atu i mua ia ù". Eita teie atua e hinaaro ia haamorihiā te tahi atua taa è atu, ia faaotihia te hoè pureraa no na, noa atu e o vai. E ara tatou e to te Eta-retia, te rahi noa nei te mau pureraa e faaotihia nei no Flosse. O vai hoi te Atua i āfaihiā mai e te mau Mitionaire, o vai te atua i tiaturihia e to tatou mau tupuna i topa aè nei.

Te riro roa nei tatou i teie mahana ei nūnaa tāparu.

Aita ānei hoì te mau òrometua e riro nei ei mau teuteu no te mau tiā poritita. Tei hea te ora e te tiāmāraa ta te fatu e tītau nei ia tātou ia pee. Te òrometua hoì te aratai, te haapii e te aò. Aita ānei te nūnaa e hoo-pātē hia nei, no teie ā hinaaro moni, no te patu i terā fare, terā fare.

Eita ānei te Fatu e ruai mai ia tātou ia òre tātou ia aratai i to na nūnaa i te ora ta na i faaineine mai no rarātou, te ora no reira o ia iho i pohe ai. Eita ānei te Fatu e ruai mai ia tātou, i te mea te aratai nei tātou i te nūnaa i te mau tiā poritita ra, no te moni e roaa mai i reira.

Ua riri te Fatu i te mau hoo taoà i taahi mai e i pārahi i roto i te fare pure. Eita ānei te Fatu e riri atoā mai i te mau hoo āiā, te mau hoo nūnaa ia pārahi mai i roto i te fare pure. Ua tahi te Fatu ia ratou i rāpae. A tae hoì e. To na roa iho mau tāvini teie e faaoti nei i te pure no teie feiā hoo taoà

Ua nounou o Iuta i te moni e ua haafaufaa òre i te ora ta to na Fatu i horoà mai, nā roto i to na mātiraahia ei pipi nā na.

Te haapiiraa a te Metia

Te vāhi tei reira to èe àau, tei reira. Aita èe fau faa. E tāvini te Metia ra, e haapaò i te àfaro o te Metia e to na a. E tāvini no te mau tiā poritita ra, eere ia te tāvini no te Metia. Eita te Atua e roaa ia haavare. Tirā rā parau.

Turo a Raapoto

**Video Club**  
Le plus grand choix de films Betamax!

**TOTAL VIDEO**

Le monde de **SONY**

Les nouveaux Walkman

Les magnétoscopes

La Video Libre

T20 T30 T50

ouvert du lundi au samedi de 8h à 12h et de 14h à 18h Pont de l'Est / tel. 3.05.45

Dites simplement le Vieux un **SONY** et seulement **SONY**

DISTRIBUE ET GARANTI PAR NOVADIS

Polygone 27852

